



UKA 2018/153
12. november 2018
Aqqaluk Heilmann

Apeqquteqaat aallaavigalugu Inatsisartuni oqallisissatut siunnersuut, nunatsinni sulisussaaleqisalerup anigorniarnissaa qanoq iliorluta aaqqissavarput?

(Inatsisartuni ilaasortaq Múte Bourup Egede, Inuit Ataqtigiit)

Siullermik qujavugut apeqquteqaat aallaavigalugu oqallisissiasamat siunnersuuteqartumut.

Takornartaanngilaq piffissap ingerlanerata ilaani suliffeqarfiit sulisussanik amingaateqalertarneri.

Pingaartumik aasakkut feeriarfiup nalaani, ullorsioqattaarnerillu nalaanni sulisussaaleqineq annertuujusartoq ilisimavarput.

Piffissallu ingerlanerani piffiit ilaanni ukiuunerusukkut inuit suliffissaaleqisarnerat annertunerusarnera malugisimasarlutigu.

Ilinniagaq tunngavigalugu atorfinitsitsiniarnerit ajornakusoorsinnaasartut piffiit ilaanni aamma ilisimaarivarput, pissutaalluni pisortat illuutaannik inissaqartitsinnginneq aporfiusinnaasarami.

Assersuutigisinnaavagut ilinniartitsisut ilinniarsimasut illoqarfinnut nunaqarfinnilu atorfinitsinneqarsinnaaneri killeqartarpoq.

Suliffeqarfippassuaqarpoq sulititsinermut atuuttunik inatsisit maleruaqqusallu malillugit ingerlasunik, soraarsitsinerit il.il ingerlasariaqartartunik, ilaatigullu inuup sulisartuusup nammineq aaliangiussaminik taama inississinnaasartunik. Taamaammat atorfinitsitsisarnermut maleruagassat suliffeqarfinniit tulluarsaqqinnerisigut sulisussaaleqilersarnerup akiorneqarsinnaanera periarfissatut ammaffigineqartariaqarpoq.

Inuk peqqissoq sulissaaq. Imminullu pilersortussaalluni. Uagut politikikkut suliassaraarput sulineq tamatigut akilersinnaanerpaajusuaannarnissaa.

Sulisinnaagaluartumut suliffissaaleqinermut ikiorsiussutaasartut aningaasartaat tamakkerlugit peeraluaraanni, malitsigisaanillu inuk nammineq pisuussutigisaminik suliffissaaleqisutut nalunaartariaqalersimasup akisussaaffik tamakkerlugu tigummisariaqalissagaluarpagu inunnik isumaginninnikkut aningaasanik tuniorarterusaarunnaartillugu tamanna qanormita kinguneqassagaluarpa? Oqanngilanga aningaasanik ikiorsiussutaasartut unitseqqullugit, unali eqqarsaatissatut tunniutiinnarpara.



Assersuutitut ilanngussinnaavarput nunatsinni oqaluffinni palasit, pattattut, ajoqit, atuaasullu amingaatisarpagut. Sumiiffiit ilaanni inissaqartitsinnginneq akikipallaartumillu naleqqutinngitsumik sulititaanerit ilagiit sinniisaannit qaqilertorneqartarpoq.

Inuttassanik amingaateqarnermi sulinerup aningaasartai aamma arajutsisimaneqarneq ajorput.

Piffiillu ilaanni Sundhedsassistent-it amingaatigineqartarput taakkunungalugu atugassarititaasut aamma nikiqassuteqarnerat tunngaviusinnaavoq.

Peqqinnissaqarfimmi akikinneruvoq suligaanni kommune-p ataani inuleriffinniit, taamatullu nunatsinni suligaanni akikinneruvoq Dk.mi sulinermiit, naak naalagaaffeqatigiikkatta pass-itigut dansk-isut innuttaassuseqaralualuta.

Suliffeqarfimmi atugassarititaasut qanorluunniit pitsaassuseqartigigaluaaraagata inuup nammineq kiffaanngissuserisarpaa sumi suliniarnerluni, pikkorissaanerit il.il ingerlalluuartusarput piffiit ilaanni eqqumaffigineqarluartarlutik, taamaakkaluartoq sulisussaaleqisarnerit takussaasinnaasarput

Ilaatigullu takusinnaasarpagut suliffeqarfiit ilai sulisussaaleqinngivillutik ingerlasarneri.

Atassutip politikikkut anguniartuarpaat, nunatsinni namminersortunngorsaanerit ilanngullugit unammilleqatigiiaat pilersinneqarsinnaanerini sulisartumut akigititaasut allatigullu unammilleqatigiinnikkut ineriartornerup nassataatigut pitsanngorsartuarnissaq.

Ilisimaarivarput unammillertup pitsaanerusoq anguniartuataa.

Suliffissaaleqisut sulisussaaleqilertartullu pillugit suliaqarsinnaanermi anguneqarsinnaanngilaq ukiut sinneruttut taamaalisooqanngisaannarnissaanik iliuseqarnissaq.

Tassa uteqattaartut inissisimassapput, suliffeqarfik akiluttoq pisortaalu ingerlatsinerluttoq sulisussaaleqisarnissaa qularnangilaq suliffeqarfimmut aqutsisugissaartumut sanilliullugu.

Taamatut ingerlajuartilluta ajoraluurtumik avataaniit tikisitsiuartariaqassaagut.

Atassummiillu eqqaaqqilaarusupparput akuersaarsinnaannginnatsigu inuit ilaasa akileraartarnikkut ilannga atornerluttarmassuk, killissartik tikillugu suliuunnaartartut utertoornissartik pillugu.

Taamatullu inuk ullaakkut itersinnaanngitsoq suliffimmillu paarsinnaanngitsoq akissarsivinni tammartartoq allatigulluunniit peqquteqartuarluni sulinngitsuukulasooq suliffeqarfimmit iluatiginissaqanngilaq allamik sulilluarsinnaasumit tigusassaqartuni.